



**Instrución 9/2023 da Dirección Xeral de Formación Profesional sobre a impartición de cursos de preparación das probas de certificación de inglés dos niveis intermedio B2 e avanzado C1 na modalidade de educación a distancia, mediante o programa *That's English!* para o curso 2023/24.**

A Lei Orgánica 2/2006, do 3 de maio, de Educación dedica o capítulo VII do Título I ás ensinanzas de idiomas. No seu artigo 59.1 organiza unha estrutura destas ensinanzas en tres niveis: básico, intermedio e avanzado. Así mesmo, o artigo 60.3 da citada lei establece que as administracións educativas poderán integrar nas escolas oficiais de idiomas as ensinanzas de idiomas a distancia e, no seu desenvolvemento, o Real decreto 1041/2017, do 22 de decembro (BOE 23/12/2017), fixa as esixencias mínimas do nivel básico A2 para os efectos de certificación, establece o currículo básico dos niveis intermedio B1, intermedio B2, avanzado C1 e avanzado C2 e establece as equivalencias entre as ensinanzas de idiomas de réxime especial reguladas en diversos plans de estudos e as descritas no real decreto.

O Decreto 81/2018, do 19 de xullo, establece o currículo dos niveis básico A1, básico A2, intermedio B1, intermedio B2, avanzado C1 e avanzado C2 das ensinanzas de idiomas de réxime especial na Comunidade Autónoma de Galicia

Na Orde ESD/1742/2008, do 17 de xuño, do Ministerio de Educación, Política Social e Deporte (BOE 19/06/08) establécense os currículos dos niveis básico e intermedio das ensinanzas de réxime especial do idioma inglés a distancia.

Na Orde ECD/1211/2014, do 8 de xullo, régulanse as características e establécese a estrutura, o currículo e as probas correspondentes ao nivel avanzado das ensinanzas de réxime especial de inglés, adaptadas á modalidade de educación a distancia.

Co fin de regular a organización dos cursos de preparación das probas oficiais de certificación de inglés dos niveis intermedio B2 e avanzado C1 a través do programa *That's English!*, a Dirección Xeral de Formación Profesional dita as seguintes instrucións.





## 1 Descrición e organización dos cursos

- Os cursos de preparación para as probas de certificación "ExamPrep B2" e "ExamPrep C1" están dirixidos ás persoas interesadas en preparar a distancia as probas de certificación de inglés dos niveis intermedio B2 e avanzado C1.
- Estes cursos impartiranse no primeiro e no segundo cuadrimestre, de acordo coa oferta que se recolle no apartado 2, e terán unha duración de 60 horas.
- O número máximo de persoas matriculadas nestes cursos será de 30, para o nivel B2, e 25, para o nivel C1.
- Estrutura do curso

No curso traballaranse as cinco actividades de lingua que se avalían nas probas de certificación oficiais das EOI, establecidas no Real decreto 1041/2017, do 22 de decembro.

O alumnado realizará 6 tarefas escritas, que serán corrixidas polo/a titor/a, e asistirá a 4 titorías de 1 hora de duración en grupos de 5 persoas. Estas titorías realizaranse exclusivamente a través de videoconferencia.

Ademais, ao inicio do curso a persoa titora realizará unha sesión de videoconferencia para todo o grupo, na que informará o alumnado sobre os horarios das titorías, o calendario de entrega das tarefas escritas e calquera outra cuestión relativa ao desenvolvemento do curso.

## 2 Centros

- Os cursos "ExamPrep B2" e "ExamPrep C1" impartiranse nos seguintes centros:

EOI	Curso			
	1º cuadrimestre		2º cuadrimestre	
A Coruña	ExamPrep B2	ExamPrep C1	ExamPrep B2	ExamPrep C1
Ourense	ExamPrep B2		ExamPrep B2	
Pontevedra		ExamPrep C1		
Ribadeo	ExamPrep B2			
Vigo	ExamPrep B2	ExamPrep C1		

- A programación anual de cada centro incluírá unha referencia a esta formación dentro do apartado dedicado á modalidade de ensino a distancia.



### 3. Datas de realización dos cursos

- a) Os cursos do primeiro cuadrimestre comezarán o 26 de setembro e rematarán o 21 de decembro de 2022.
- b) Os os cursos do segundo cuadrimestre comezarán o 26 de febreiro e rematarán o 24 de maio de 2023.

### 3 Criterios de admisión do alumnado

1. Para acceder a estas ensinanzas é requisito imprescindible ter dezaseis anos cumpridos no ano en que se inicien os estudos. Así mesmo, poderán acceder as persoas maiores de catorce anos, se o idioma inglés non é a primeira lingua estranxeira cursada na educación secundaria obrigatoria.
2. Ademais, as persoas interesadas en realizar estes cursos deben residir na Comunidade Autónoma de Galicia.
3. Para matricularse nestes cursos non é necesario estar en posesión dun certificado do nivel inferior.

### 4. Procedemento e prazo de inscrición

1. A inscrición realizarase por vía telemática a través da seguinte ligazón:  
<https://examprep.thatsenglish.com>.
2. O alumnado deberá acceder á web do curso elixido e iniciar o proceso de gravación de datos persoais, seleccionar a quenda de preferencia, aceptar as condicións e a política de protección de datos e realizar o pagamento.

Una vez realizado o pagamento correctamente, o alumnado ten asegurada a súa praza no curso asignado e na quenda seleccionada.

#### 3. Prezos públicos

O curso de preparación de probas ten un custo de 150 € que se aboará exclusivamente por TPV virtual.

O alumnado destes cursos non terá que facer efectivo o pagamento de prezos públicos para a realización das probas terminais de certificación correspondentes ao nivel en que estea matriculado, aínda que si deberá realizar a inscrición na convocatoria correspondente das probas de certificación, de acordo co establecido no apartado número 6 desta instrución.





#### 4. Prazo de inscrición:

O prazo de inscrición abranguerá dende o 11 ao 22 de setembro de 2023, para os cursos do primeiro cuadrimestre e dende o 12 ao 23 de febreiro, para os cursos do segundo cuadrimestre.

#### 5. Presentación da documentación

Tras realizar o pagamento, o alumnado recibirá un correo electrónico co recibo do pagamento e outro coas instrucións da entrega da documentación.

O alumnado disporá de tres días laborables para presentar a seguinte documentación:

- DNI, NIE ou pasaporte.
- Documentación acreditativa de residir na Comunidade Autónoma de Galicia.

A documentación enviarase ao correo electrónico [examprep@thatsenglish.com](mailto:examprep@thatsenglish.com)

#### 6. Desistencia

Unha vez formalizada a matrícula, e de acordo co disposto na Lei 3/2014, do 27 de marzo, pola que se modifica o texto refundido da Lei xeral para a defensa dos consumidores e usuarios e outras leis complementarias, o alumnado terá dereito a desistir da inscrición, sen indicar ningún motivo, durante un período de 14 días naturais desde o momento do pago da inscrición.

Neste caso, o alumno/a deberá cubrir o [formulario de desistencia](#) e envialo ao seguinte enderezo electrónico: [devoluciones@thatsenglish.com](mailto:devoluciones@thatsenglish.com).

Despois de que a sociedade encargada da xestión do proxecto (Eductrade) comprobe que os prazos son correctos e que non se fixo uso do servizo, realizarase a devolución do importe aboado polo mesmo método polo que se realizou o pago.

O dereito de desistencia non será aplicable se os servizos foron utilizados polo/a alumno/a.

Unha vez transcorrido o período de 14 días estipulado pola lei, só procederá a devolución da inscrición por causas xustificadas imputables ao programa. Non se admitirá a solicitude de devolución por causas imputables ao alumnado.

### 5. Incompatibilidades

1. O alumnado destes cursos non poderá estar matriculado no mesmo nivel en ningunha outra modalidade. Cando se detecte duplicidade de expedientes, o alumnado deberá optar por unha das modalidades, renunciando voluntariamente á outra.





2. Así mesmo, este alumnado non poderá matricularse en dous niveis simultaneamente nin realizar o mesmo nivel nos dous cuatrimestres, pero si poderá matricularse no segundo cuatrimestre nun nivel distinto ao que realizou no primeiro.

## **6. Probas de certificación**

1. A realización do curso non dará dereito a ningún tipo de certificación, por tratarse dun curso preparatorio para as probas conducentes á obtención dos certificados dos niveis B2 e C1.

2. O alumnado poderá obter os certificados dos niveis B2 ou C1 presentándose ás probas de certificación de cada nivel nos prazos e de acordo co procedemento que estableza esta dirección xeral para cada convocatoria.

3. O alumnado matriculado nos cursos do primeiro cuatrimestre realizará a proba de certificación polo réxime libre, nunha única convocatoria.

4. O alumnado matriculado nos cursos do segundo cuatrimestre realizará a proba de certificación no mes de xuño, en convocatoria ordinaria e extraordinaria.

5. A avaliación desta modalidade das ensinanzas de idiomas de réxime especial terá como referencia os obxectivos e os criterios de avaliación establecidos nos currículos correspondentes aos niveis intermedio B2 e avanzado C1 na modalidade a distancia.

6. As probas de certificación administraranse nas datas e segundo as especificacións establecidas pola Consellería de Cultura, Educación, Formación Profesional e Universidades.

Santiago de Compostela

A directora xeral de Formación profesional

María Eugenia Pérez Fernández

